

Zekaráya

Ojejoje ekuphuta ndu Ízurelu azu

¹ L'ónwa k'èsato; l'afa, kwe Dariyosu afa èbo, ọ wataru ọ bụ eze ndu Peshiya; bẹ Ojejoje kfuru yeru onye nkfuchiru iya, bụ Zekaráya Berekaya; mbụ nwanwa Ido; sụ iya: ² “Lẹ Ojejoje; bẹ ẹhu ghuru eghughu nshinu l'ẹke ndiche unu phẹ nọ. ³ Ọo ya bụ t'i kfuru ndu ono l'owaa iphe Ojejoje, bụ Ọkaribe-Kakọta-Ike l'ekfu: T'unu lata azu lakfuta iya; k'ọphu ya a-lata azu lakfuta unu. Ono kwa iphe Ojejoje, bụ Ọkaribe-Kakọta-Ike ekfu ndono. ⁴ Unu ba adukwa l'ọ bụ ndiche unu phẹ, bụ ndu ono, ndu nkfuchiru kẹ mbụ kfuhawaru okfu ẹhu ẹphe; sụ: ‘Lẹ Ojejoje, bụ Ọkaribe-Kakọta-Ike sụru t'ẹphe haa ejo ọzo ono, ẹphe eshi ono; ẹphe esee ẹka l'ejo iphe ono, ẹphe eme ono.’ Obenu l'ẹphe ta ngaduru iya nchi; ọphu ẹphe 'eyeduru iya onu. Ono iphe Ojejoje ekfu ndono. ⁵ ?Bụ awe; bẹ ndiche unu obu nọ nta-a? Tọo ndu nkfuchiru obu; ?ẹphe anojewaru gbururu jeye tọo. ⁶ Iphemiphe obule, ya kfuru; mẹ iphe ya toru okpa iya ono, bụ iphe ya kfuru ndu ozi iya, bụ ndu nkfuchiru t'ẹphe mee ono; ? tọ vudu l'ẹhu ndiche unu phẹ tọo. Ẹphe akwaa izimana; sụ: ‘Lẹ Ojejoje, bụ Ọkaribe-Kakọta-Ike meekwaru ẹphe iphe gbaru ẹphe lẹ kẹ egbe ọzo, ẹphe eshi; mẹ ẹge umere ẹphe gbaru; mbụ l'ọ meleruphu ẹphe iphe ọ tüberu k'ememe.’ ”

Àphù k'òdungu: Ìnya lẹ ndu agba iya nù

⁷ Yo rua l'ònwá Shebatu, bú iya bú ònwá kẹ iri lẹ nanù gbaru ụkporo abalì l'abalì ẹno l'afa, kwe Dariyosu afa ẹbo, ọ wataru ọbu eze; Ojejoje abya ekfuru yeru onye nkfuchiru, bú Zekaráya Berekaya; búru nwanwa Ido. Zekaráya asu: ⁸ Ọ bú l'enyashi; bẹ mu phuru àphù; phua nwoke, l'agba l'inya uswuswe! Nwoke ono vudo lẹ mgbaku oshi míturu, nọgbaa l'ẹke, nwulahuru enwulahu. Ìnya ndu ọphu vudogbaa ya l'azụ nweru ndu ọphu eke uswuswe; nweru ndu ọphu eke mkpukpu bya enweru ndu ọphu acha ụcha. ⁹ Mu abya aji iya: “Onye nwe mu nù; ?bù ngunu; bẹ iphe-a bụgbaa?”

Ojozi-imigwe, ekfu eyeru mu nù asu lẹ ya e-koshi mu-a iphe ẹphe bụgbaa. ¹⁰ Tọ dú iya bú; nwoke ono, vudo lẹ mgbaku oshi míturu ono abya eyee ọnu; sù: “Lẹ ndu-a bú ndu ono, Ojejoje yeru t'ẹphe je etsoru mgboko l'ọ ha l'ejephe ono.”

¹¹ Ẹphe ejee bya edooru Ojozi-imigwe Ojejoje ono, vudo lẹ mgbaku oshi míturu ono; sù: “L'ẹphe tükookwaru mgboko l'ọ ha jekota; phuwaa lẹ mgboko gbaa mgburumburu daru jiii; nchì adù ẹphe ndo.”

¹² Tọ dú iya bú; Ojozi-imigwe Ojejoje ono asu: “Nggube Ojejoje, bú Ọkaribe-Kakọta-Ike! ?Bù teke ole; bẹ aa-nọ-bebe; tẹmanu nggu aphuaru Jerúsalemu yẹle mkpukpu, nọgbaa lẹ Júda imiko; mbù ndu ono, i shiwa keshinu ụkporo afa ẹto l'afa iri ọphu, sweru nù tukoshita ẹhu-eghughu ngu ono.”

¹³ Ya ndono; Ojejoje abya egude olu, dú bebebe; dua ojozi-imigwe ono, kfuru yeru mu

nụ ono ike. ¹⁴ Ojosi-imigwe ono, shi ekfu anụ mu nụ ono asụ mu: “Tẹ mu raa ya arara lẹ Ojejoje, bụ Okaribe-Kakọta-Ike; bẹ sụru lẹ ya ekoshikwa okopho ike l'okfu ẹhu mkpukpu Jerúsalemu yẹle Ugvu Záyọnu. ¹⁵ Obenu lẹ ndu ẹhu eghushi mu eghughu ike l'ẹke ẹphe nọ bụ mbakeshi ndu onanu, bu túsaru ẹhu ono. Ẹhu te shiduru eghu mu eghughu kẹ egbe iya ono; ọle ẹphe byawaru bya emee tẹ iphe-ẹhuka kẹ ndibe mu ka ẹji.” ¹⁶ Ọo ya bụ; ọwaa iphe Ojejoje ekfu: Lẹ ya awata ọphuru Jerúsalemu imiko ọdo. Eze-ulo iya ono; bẹ aa-kpụ-phu l'ẹka ono. A bya egude eri, eegudeje átù iphe atùtù; gude tụa Jerúsalemu. Ono iphe Ojejoje ekfu ndono.

¹⁷ Wo mu tẹ mu rabakwaa ya rụ araraa lẹ Ojejoje, bụ Okaribe-Kakọta-Ike sụkwaru: L'iphe bụ mkpukpu iya l'ọ ha; bẹ iphemiphe ọbule a-bya a-tụko bụru ọpete ọdo; Ojejoje abya adua Záyọnu obu; bya afọta Jerúsalemu ọdo.

Àphù k'ẹbo: Mpo ẹno lẹ ndu ọzu ẹno

¹⁸ Mu bya apalia ẹnya; mpo ẹno anọduwa mu l'ifu. ¹⁹ Mu bya ajia ojosi-imigwe ono, shi ekfu anụ mu nụ ono: “?Bụ ngunu ndọ-ọ?”

Yọ sụ mu: “L'ọ kwa mpo ono bụ mpo, bụ iya chịshikotaru ndu Júda; mẹ ndu Ízurelu waa ndu Jerúsalemu.”

²⁰ Ya ndono; Ojejoje abya ekoshi mu ndu ọzu ẹno. ²¹ Mu abya ajia; sụ: “?Bụ ngunu; bẹ ndu-a abya ememe?”

Yọ sụ mu: “L'ọo ndu-a bụ mpo, chikashiru ndu Júda; k'ọphu bụ l'ẹ tọ dūhedu onye ọphu dūru ike palikwada ishi ọdo. Obenu lẹ ndu

uzu-wa byaru t'ephe bya eyee ephe égvú; chitsushia mpo iphe bu mbakeshi ono, ephe chilishiru; mabe l'ali Júda; k'ophu ephe e-gude iya chikashia ndu, bu iya nu."

2

Àphù k'eto: Eri, eegudeje atụ iphe

¹ Mu abya ejeshia opali enya; yo nweru nwoke, vudo mu l'ifu. Iphe o gude l'eka aburu eri, eegudje atụ iphe. ² Mu ajia ya; sụ: "Bụ awe; be iije?"

Yọ sụ mu: "Lẹ ya ejekwa Jerúsalemu tẹ ya je atụ; maru ege ụsa iya; me ogologo iya habe."

³ Ojozi-imigwe ono, shi ekfu anụ mu nu ono atugbua; Ojozi-imigwe odo ejekfushia ya; ⁴ je asụ iya: "Gude oso je asụ nwokorobya ono lẹ Jerúsalemu a-bukwaru mkpukpu, mgbodo, e gude kpụ-pee ya mgburumgburu ta nohedu; kele ndu bu iya nu; me elu, no iya nu ghataru nshinu. ⁵ Yebedua l'onwiya a-buru oku kpua l'o bu mgbodo no-pee mkpukpu ono mgburumgburu. Ya a-nodu l'ime iya buru akpabiri iya."

Ndu a kpuru lẹ ndzu; be eeku t'ephe lata azu

⁶ Owaa iphe Ojejoje ekfu: O sụru: T'unu bya! Unu bya! Unu shi l'ali ndu uzo isheli ono gbafuta; kele ya shi chikashiwa unu; unu atuko mgboko dzuru. Ono iphe Ojejoje ekfu ndono.

⁷ Unu lenu! Unu gbaru laa Zayonu; unube ndu ono, bu lẹ Babylonu ono; ⁸ kele Ojejoje, bu Okaribe-Kakota-Ike sụru: "L'iphe bu onye, denyiru unu eka bukwa nwandodo-enya iya b'o ruru iya eka. Teke o kwabekpooru iya ugvu bya

ezia ya tẹ ya je etso ọha ono, kwaru iphe unu ono l'ọgu; ⁹ b'ẹ to nwedu iphe e-me tẹ ya ta palia ẹka iya nua ndu ono aphu; k'ọphu bu ẹ ndu shi buru ohu ẹphe a-ghakọbe; gwoo iphe ẹphe laa. O bu teke ono; bẹ unu a-maru l'ọo Ojejoje, bu Ọkaribe-Kakọta-Ike; bẹ ziru iya tẹ iya bya.

¹⁰ “Unu tẹ ọzu; t'ẹhu tsokwaaphu unu ẹna; unubẹ unwu Záyọnu; kẹ ẹ ya abyawa tẹ ya bya eburu l'ẹke unu bu! Ono iphe Ojejoje ekfu ndono. ¹¹ Mba, dọ igweligwe a-tugbabe onwẹphe; ẹphe ẹ Ojejoje; m'o -rulephu mbọku ono. Ẹphe a-buru ndibe Ojejoje; Ojejoje eburu l'ẹke ẹphe bu; k'ọphu unu a-maru l'ọo Ojejoje, bu Ọkaribe-Kakọta-Ike; bẹ ziru mu tẹ mu bya. ¹² Ojejoje e-keta Júda t'ọ buru òkè-iphe iya l'alì, ono, dọ nsọ ono; yọ byakwa afọta Jerúsalemu ọdo. ¹³ Unubẹ unwu eliphe l'unu ha; unu nọdulekwaphu nwangijinggiji l'ifu Ojejoje; kẹ l'ọ kpatsuwaru onwiya l'ẹke ono, o bu, dọ nsọ ono.”

3

Àphù k'ẹno: Uwe onye ishi ndu, achijeru Nchileke ẹja

¹ Tọ dọ iya bu; yọ bya ekoshi mu Jóshuwa, bu iya bu onye ishi ndu achijeru Nchileke ẹja l'ẹke o vudo l'ifu ojozi imigwe Ojejoje ono. Obutuswe vudokwa iya phù l'ẹka-utara; l'ebo iya ibo. ² Tọ dọ iya bu; Ojejoje abya asu Obutuswe: “Tẹ Ojejoje bakwaaru ngu mba; nggube Obutuswe! Mbù tẹ Ojejoje ono, bu iya fọtaru Jerúsalemu ono bakwaaru ngu mba! Ẹ nwoke-a dukwa l'ọ bu otsebere-nku, a lofutaru l'ọku.”

³ Teke ono, Jóshuwa vudo l'ifu ojozi-imigwe ono; bẹ uwe, o yeru l'ehu; bẹ inyi, nọ iya nọ kpọru ole ẹnya. ⁴ Ojozi-imigwe ono asụ ndu vudo iya l'ifu: "T'ẹphe yefu iya uwe ono, kpọru ole ẹnya ono." Yọ bya asụ Jóshuwa: "T'o lekwa; lẹ ya wofuakwaru iya iphe dọ ẹji, o meshiru; nta-a; bẹ ya abyawa iya oyebe uwe, vu oke aswa."

⁵ Tọ dọ iya bụ; ya asụ t'ẹphe wota okpu-ekwa, inyi ẹ-ta nọdu; kpube iya l'ishi. A bya eworu okpu-ekwa, inyi, ẹ ta nọdu kpube iya l'ishi; bya eworu uwe yee ya. Ojozi-imigwe Ojejoje ono abya evudo-kube iya.

⁶ Ojozi-imigwe Ojejoje ono abya ekfuru Jóshuwa; sụ iya: ⁷ Lẹ Ojejoje, bụ Okaribe-Kakọta-Ike; bẹ sụkwaru: "L'ọ -buru l'ii-nọdu etso ụzo iya; l'emekwaphu iphe ya sụru t'i meje; bẹ ii-bụkwa onye ishi l'ulo iya; buru iphe i sụru t'e mee l'ufu iya; bẹ ee-meje. Ya a-nụkwa ngu phụ ike t'i tsoru lẹ ndu-a, vudo ẹke-a. ⁸ Nngube eze onye ishi ndu achijeru Nchileke ẹja, bụ Jóshuwa; mẹ lẹ ndu otu ngu phẹ, bụ ndu nọnyabe ngu nọ ẹke ono; mbụ ndu agba ama iphe e-me l'uzo ifu; unu ngabe nchị. Mu e-mekochakwa-a duta nwozi iya ono, bụ Ẹkali-oshi ono duru bya. ⁹ Unu phụkwa mkpuma, ya tọgboru l'ifu Jóshuwa! Mkpuma lanụ ono moru ẹnya ẹsaa. Ya e-de iya iphe l'eli; ọ kwa iphe Ojejoje, bụ Okaribe-Kakọta-Ike ekfu. Lẹ ujiku lanụ; bẹ ya e-wofu iphe dọ ẹji, ndu alị-a mejekpooru. ¹⁰ Mbọku ono; bẹ iphe bụ onyenonu e-ku ibe iya t'ọ bya t'ẹphe nọkobe lẹ mkpuli oshi vayinu unu yẹle mkpuli oshi

figu unu.” Ono kwa iphe Ojejoje, bu Ọkaribe-Kakọta-Ike ekfu ndono.

4

Àphù k'ise: Iphe atukobeje urọku; mę oshi olivu labu

¹ Tọ dọ iya bu; ojozi-imigwe ono, shi ekfu anu mu nu ono alaphutashia azu; byakfuta mu bya etelaha mu l'ọ bu onye ete madzọ lę mgbenya.

² Yọ jia mu; sọ: “?Bụ ngunu; bę mu phuru?”

Mu asu iya: “Lę mu phuru iphe aatukobeje urọku, e meru lę mkpọla-ododo. Iphe tukoru l'eli iya bu ochi ite-urọku; waa ire-ọku ęsaa l'eli iya; ọzo, shigbaa l'urọku ono lufuta dukwaphu ęsaa. ³ Iphe gvuru lę mgboro iphe ono, aatukobeje urọku ono bu oshi olivu labu; nanu gvuru l'ęka-utara ochi ono; ophu egvuru iya l'ęka-ibyita.” ⁴ Mu abya aja ojozi-imigwe ono, ekfu anu mu nu ono sọ iya: “Onye-nwe mu nu; ?bu ngunu dọ ęge-a?”

⁵ Ojozi-imigwe ono asu mu: “?Mu ta madu iphe iphe-a bu tọo?”

Mu asu iya: “Onye-nwe mu nu; mu ta makwa.”

⁶ Ya ndono; yọ sọ mu: “L'owaa kwa iphe Ojejoje kfuru Zerúbabelu: ‘E tọ kwa l'okpehu; tọ bu l'ike; o kwa lę Ume kę yebe Ojejoje.’ Ono kwa iphe Ojejoje, bu Ọkaribe-Kakọta-Ike ekfu.

⁷ “Nggube oke ugvu; ?i bu ngunu? L'ifu Zerúbabelu; bę ii-mekochakwaa buru ali, hako ahako. O bu teke ono; bę Zerúbabelu e-dobe mkpuma mkpochi-ishi iya; aatu ọzu l'ekfu: ‘Tę

Nchileke gòru ònu-òma nù iya-o! Tẹ Nchileke gòru ònu-òma nù iya-o!’ ”

⁸ Tọ dù iya bụ; Ojejoje abya ekfuru yeru mu; sù mu: ⁹ “Ọ bụ Zerúbabelu; bẹ gude ẹka iya tụa ọkpa eze-ulo Nchileke-a. Yọ buru iya e-gudekwaphu ẹka iya kpụ-ghee ya. Ọ bụ teke ono; bẹ unu a-maru l'ọo Ojejoje, bụ Ọkaribe-Kakọta-Ike; bẹ ziru mu tẹ mu byakfuta unu.

¹⁰ “Unu ba sụkwa: ‘?Nanụ iphe ọbu eeme ọbu?’ Kẹle ndiphe; bẹ ẹhu a-tsọkwa ẹna teke ẹphe a-phụ Zerúbabelu; yọ palia mkpuma ye l'ẹke akpụ ulo ono.

“A bya l'ẹnya ẹsaa phụ; ẹnya ẹsaa ono bụkwa ẹnya Ojejoje, anọduje agba mgboko mgburumgburu.”

¹¹ Mu abya ajị ojozi-imigwe ono; sù iya: “?Bụ ngunu; bẹ oshi olivu labụ-a phụ, nọgbaa urọku ono ẹka-labụ phụ bụ?” ¹² Mu abyakwaphu bya ajị iya ọdo; sù: “?Bụ ngunu; bẹ ẹkali-oshi olivu labụ-wa, nọgbaa l'iku ntofu labụ-a bụ, e gude mkpọla-ododo mee; manụ eshi iya l'atsọshi atsọshi?”

¹³ Yọ sù mu: “?Mu ta madu iphe iphe-a bụ tọo?”

“Onye-nwe mu nù; mu ta makwa.”

¹⁴ Yọ sù mu: “Ndu ono bụ ụmadzu ẹbo ono, a wuru manụ t'ẹphe jeeru Nnajiufu, nwe mgboko ozi ono.”

5

Àphù k'ishingu: Ẹkwo, ephe ephephe

¹ Mu abyakwa bya elee ẹnya ọdo; phụ ẹkwo, a gwọru agwọru; yoo phe ephephe! ² Ojozi-imigwe ono asụ mu: “?Bụ ngunu; bẹ mu phuru?”

Mu asụ iya: “Lẹ mu phuru ẹkwo, aphụphu, a gwọru agwọgwo, ephe ephephe. Ẹkwo ono dụ ụkporo nkwo-ẹka l'ogologo bya adụ nkwo-ẹka iri l'usa.”

³ Yọ sụ mu: “L'iphe nọ l'ẹkwo ono bukwa ọnu, Nchileke turu alị gbaa mgburumgburu. Iphe e deru l'ẹkwo ono nanụ bụ lẹ ndu iphura l'ephe ha; bẹ a-chihu nụ. L'ẹka iya ọphu b'ọ sụru l'iphe bụ ndu akpapyabeje iphe ephe meru ria angụ; bẹ ee-me t'ephe chihu.” ⁴ Ojejoje, bụ Ọkaribe-Kakọta-Ike asụ: “Ya a-tụ ndu oshi ono ọnu; tükokwaphu ndu ono, akpapyabeje iphe ephe meru gude ephe iya gụa ẹnwa ono ọnu. Ọnu ono, ya a-tụ ephe ono a-ba l'ulo ephe; mebyishia ya; mebyishia jeye l'oshi, e gude kee ụlo iya; mę mkpuma, e gude kpua ya.”

Àphù kẹ nwanyi, nọ lẹ nkata

⁵ Ya ndono; ojozi-imigwe ono, shi ekfu anụ mu nụ ono bya akpịrita bya asụ mu: “Tẹ mu palia ẹnya; phụkpoduaphu iphe abya alufuta nta-a.”

⁶ Mu aji iya: “?Bụ ngunu ndono?”

Yo sụ mu: “Ọ kwa nkata, eegudeje atụ iphe.” Yọ sụ mu: “L'ọwaa bụ iphe dụ eji, ndu alị-a gbaa mgburumgburu mekotaru.”

⁷ A bya ekpulia igbidigbi okfu nkata ono; mu aphụ nwanyi, nọdu anọdu l'ime iya.

⁸ Ojozi-imigwe ono asụ mu: “Lẹ nwanyi ono; bẹ nọ-chiru ẹnya ejo ọkpoma.” Yọ bya enwuphu iya azụ l'ime nkata ono; bya eworu igbidigbi okfu

nkata ono kpuchiphu azụ ọdo. ⁹ Mu abya apalia ọnya; phụ ụnwanyi labụ, ephe ephephe. Ẹbà ephe adulephu l'ọ bụ ẹbà ọku-eswi-uda. Ephe abya agulia nkata ono parua ya mgbaku alị yẹle igwe.

¹⁰ Mu aji ojozi-imigwe ono, ekfu anụ mu nụ ono ẹke ephe pa nkata ono eje?

¹¹ Yọ sụ mu: “L'ephe pa iya eje alị Shina t'ephe je akpụaru iya ụlo. A -kpughela iya phụ; e woru nkata ono sùbe l'ọnodu iya l'ẹke ono.”

6

Àphù k'èsato: Ụgbo-inya ẹno

¹ Mu abya apalia ọnya ọdo; phụa ụgbo-inya ẹno l'ẹke ephe shi lẹ mgbaku ugvu labụ l'ekpushi. Ugvu ono bụ ugvu ope. ² Ụgbo-inya kẹ mbụ bụ inya, ekegbaa uswuswe; bẹ lọkpụ iya nụ. Ụgbo-inya kẹ ẹbo abụru inya, ejitsua uji; bẹ lọkpụ iya nụ. ³ K'eto abụru inya ọcha; bẹ lọkpụ iya nụ. K'eno abụru inya, tushitsuaru iphe; bẹ lọkpụ iya nụ. Inya ono l'ephe ha; bẹ ike nọkota. ⁴ Mu abya ajia ojozi-imigwe ono, ekfu anụ mu nụ ono; sụ iya: “Onye-nwe mu nụ; ?bụ ngunu dū ẹga-a?”

⁵ Ojozi-imigwe ono asụ mu: “Lẹ ụgbo-inya ẹno ono bụ ephe bụ pherephere, eshije l'igweli ụzo ẹka ẹno. Ọ bụlephu nta-a; bẹ ephe shi l'ifu onye, nwe mgboko. ⁶ Inya ndu ọphu ejitsua uji lọkpụ ụgbo-inya nk'ephe chebe ifu l'ụzo isheli. Inya ndu ọphu achatsua ụcha alọkpuru ụgbo-inya nk'ephe chebe ifu l'ụzo ọnyanwu-arịba. Inya

ndu ophu tũkashiru iphe atũkashi alokputsuaru ugbonina nk'ephe; chebe ifu l'uzo ohuda."

⁷ Teke inya ono, ike du ono wufutaru; be onma ephe anmanma l'ehu t'ephe wufu je etsoru mgboko mgburumgburu l'agbaphe. Ojozi-imigwe ono asu ephe: "T'ephe je; ejee agbaphee mgboko mgburumgburu." Ephe atugbua je ejephee mgboko mgburumgburu. ⁸ To du iya bu; ojozi-imigwe ono ekua mu te mu leduduphu: "Le inya ndu ophu eje ala uzo isheli meekwaru; te obu gvuru mu egvuru l'uzo isheli ono."

Ekpube Jóshuwa okpu-eze

⁹ Ojejoje abya ekfuru yeru mu; su mu: ¹⁰ "Te mu nata ndu-a mkpola-ocha yele mkpola-ododo l'eka Heludayi; me Tobyija; me Jedaya, bu ndu shi le Babylonu, bu eke e shi kpu ephe le ndu; lata. Mboku ono kwaphu; be ii-je ke Josaya, bu nwatibe Zefanaya. ¹¹ Mkpola-ocha ono yele k'ododo ono; be mu e-gude mee okpu-eze; kpube onye ishi ndu, achijeru Nchileke aja; mbu Jóshuwa, bu nwatibe Jehozadaku. ¹² Wo mu te mu su iya le Ojejoje, bu Okaribe-Kakota-Ike suru: 'Lo kwa nwoke-wa; be epha iya bu Ekali-Oshi. Oo-shi l'ekali eke onono jakashia je akpu eze-ulo Nchileke. ¹³ Oo yebedua a-kpu eze-ulo Nchileke. Aa-kwabephe iya ugve-eze; yo nodu l'aba-eze iya chilahaa. Oo-dobekwaphu onye achijeru Ojejoje aja l'aba-eze iya ono. Nchi adu ephe ebo ndoo l'iphe ephe eme.' ¹⁴ Okpu-eze ono; be ee-dobe l'eze-ulo Nchileke to buru iphe ee-gudeje nyata Heludayi; Tobyija; Jedaya; me Henu Zefanaya. ¹⁵ Ndu, bu l'eke, teru enya

a-bya bya eyeta ẹka t'a kpua eze-ulo Nchileke. O bu teke ono; be unu a-maru l'oo Ojejoje, bu Okaribe-Kakota-Ike; be ziru mu te mu bya. Iphe ono l'o ha e-mekota me unu fupyabe ifu; l'anuru Ojejoje, bu Nchileke unu okfu.”

7

Aswiswi iphoro

¹ Yo be l'afa, kwe Dariyosu afa eno; k'ophu o duberu buru eze; l'onwa ke tete, bu iya bu onwa Kisulevu gbaru abali eno; Ojejoje abya ekfuru yeru Zekaraya. ² Teke ono; be ndu Betelu zihawaru Sharaza; me Regemu-Meleku; me ndibe ephe t'ephe roo Ojejoje iphe; ³ yele t'ephe jia ndu achije eja l'eze-ulo Nchileke, bu Okaribe-Kakota-Ike; ephe le ndu nkfuchiru Nchileke; su ephe: “?Ya a-swí aswiswi; kwaa ekwa l'onwa k'ise ege ono, ya shi keshinu afa olemole meta-a ono?”

⁴ Ojejoje, bu Okaribe-Kakota-Ike asu mu: ⁵ “Te mu jia iphe bu ndu ali-a l'ephe ha; me ndu achijeru Ojejoje eja; su ephe: ‘Teke ono, ephe shi aswije aswiswi; l'akwa ekwa l'iphe bu onwa k'ise; me onwa k'esaa keshinu k'ukporo afa eto l'afa iri ophu sweru nu-a; ?bu-a l'okfu eka iya; be unu shi anoduje eme iya to? ⁶ Odo aburu: teke ono, unu shi anoduje eri l'angu ono; ?to budu eswa onwunu; be unu shi anoduje eme. ⁷ Iphe ono l'o ha: ?to budu iphe Ojejoje shi l'onu ndu nkfuchiru ndiche kfua teke ono, Jerusalemu; me le mkpukpu, no-pheru iya mgburumburu bu l'ehu-agu; eku l'abyaru ephe; mbu teke ono,

madzụ shi buru l'uzo ọhuda; me l'alì ọkpa-ugvu, nọ l'uzo ẹnyanwu-arịba ono.' ”

⁸ Ojejoje abya ekfuru yeru Zekaráya; sụ iya:

⁹ “Ọwaa iphe Ojejoje, bụ Ọkaribe-Kakọta-Ike ekfu: ‘Unu kpeje ikpe, dū maa. Unu emejeru ibe unu iphe-oma; phụaru ẹphe imiko. ¹⁰ Unu ba akpapyajekwa unwanyi, maa tufuru ishi; ndu a toru ogbe; ndu, laru alala; me ndu ukpa. Ophu o dukwa l'unu ha onye a-rijeru ibe iya ẹjo ọriri.’

¹¹ “Obenu l'ẹphe jikaru ọngabe nchị; gude ẹjo ọkpoma kwefu ike; bya eworu nchị swọ-chishia t'ẹphe ba nushi iphe ookfu. ¹² Ẹphe kpọru ọkpoma ẹphe gbingu l'ọ bụ mkpuma; jika l'ẹphe ta angabedu nchị l'ekemu; me l'okfu Ojejoje, bụ Ọkaribe-Kakọta-Ike kfuru nū ẹphe; mbụ ozi, o gude Ume nk'iya shi l'ọnu ndu nkfuchiru ndiche kfuaru ẹphe. Yọ buru iya meru; ẹhu awata oghu Ojejoje, bụ Ọkaribe-Kakọta-Ike eghughu nshinu.

¹³ “ ‘Teke ya kuru ẹphe; be ẹphe ta ngaduru iya nchị. Ọo ya kparu iphe teke ẹphe kuru iya; be ya te yeduru ẹphe ọnu.’ Ono iphe Ojejoje, bụ Ọkaribe-Kakọta-Ike ekfu ndono.

¹⁴ ‘Ya abya egude oke pherephere zikashia ẹphe nanu nanu; ẹphe edzuru iphe bụ mbakeshi; ghoshia ndu ẹbyee. Alì ono, ẹphe gwọberu ono adaburu ochobo; k'ophu bụ l'ẹ tọ dūhedu onye atujekwadu ọkpa l'ẹke ono. Ẹphe emee t'egbara kfua l'ẹgiri alì ono.’ ”

8

Ụkwa ke l'ee-dobephu Jerúsalemu azu l'onodu iya

¹ Ojejoje, bu Ọkaribe-Kakọta-Ike abya ekfuru yeru mu ọdo; su: ² L'ọwaa kwa iphe Ojejoje, bu Ọkaribe-Kakọta-Ike ekfu: “Lẹ ya ekokwa okopho ẹhu Záyọnu nshinu; mbụ l'okopho ẹhu iya enwukwa iya l'ọ bu ọku l'ẹhu.” ³ Ojejoje sụru: “Lẹ ya a-laphutakwa azụ lẹ Záyọnu je eburu eburu lẹ Jerúsalemu. Ono teke aa-wata oku Jerúsalemu 'Obodo ire-lanụ'; kulahaa ugvu kẹ Ojejoje, bu Ọkaribe-Kakọta-Ike ono 'Ugvu, dụ Nsọ.' ” ⁴ Ojejoje, bu Ọkaribe-Kakọta-Ike sụru: “L'unwoke ọgurennya; ẹphe l'unwanyị ọgurennya e-mekochaa wata ọno l'esu-uzo Jerúsalemu ọdo; onyenọnu; yo tsu mgboro iya; kẹ l'ọ buwa ọgurennya. ⁵ Ụnwu-mgboko mę ụnwu-okorọbya e-jije gbororo uzo mkpukpu ono l'egvu egvu.”

⁶ Ojejoje, bu Ọkaribe-Kakọta-Ike sụru: “L'ọo-dụkwa nwa ndu ọphu phọduru nụ biribiri teke ono; obenu; ọo-duhunu yẹbedua biribiri.” Ono kwa iphe Ojejoje, bu Ọkaribe-Kakọta-Ike ekfu ndono. ⁷ Ojejoje, bu Ọkaribe-Kakọta-Ike sụru: “Lẹ ya a-dzọta ndibe iya l'ẹka ndu alị, ụzo ẹnyanwu-ahata yẹle ẹka ndu ọphu, bu l'uzo ẹnyanwu-arịba. ⁸ Ya e-duphuta ẹphe azụ t'ẹphe bya eburu lẹ Jerúsalemu. Ẹphe a-buru ndibe iya; ya abụkwanuru ẹphe onye ire-lanụ; buru onye, doberu ẹka ndoo; kele ya bu Nchileke ẹphe.”

⁹ Ojejoje, bu Ọkaribe-Kakọta-Ike sụru: “T'ẹka ba atsukwa unu ume; unubẹ ndu anụ okfu-anta, bu okfu, ẹphe kfuru; mbụ ndu nkfuchiru Nchileke, nọ l'ẹke ono teke a turu ọkpa ụlo Ojejoje, bu Ọkaribe-Kakọta-Ike; k'ọphu aa-kpụ eze-ulo ono kpụ-ghee. ¹⁰ Tẹmanu t'a tịa ọkpa

ụlo ono b'ẹ te shidunu akfuje madzu ugwo-ozì; t'e shi akfuje iya anumanu. Ophu ọ dudu onye shi atusajeru ẹhu l'ẹje ozi iya; l'ẹke onyenonu shi atsụ ọhogu iya egvu; kele ya shi mee; onyemonye aburu ọhogu ibe iya. ¹¹ Obenu ẹ nta-a; be ya te emehedu nwa ndu ophu phoduru nu ẹ ndu-a ẹge ya meru l'oge ke ndiche ono." Ono kwa iphe Ojejoje, bu Okaribe-Kakota-Ike ekfu ndono. ¹² "Iphe e meberu l'alì a-nodu eme ọhuma: oshi vayinu a-nodu mi ẹge gbaru nu; alì emetalahaa iphe e meberu iya; iji adalahaa. Iphe ono l'ọ ha; be ya e-dobe t'ọ buru okè-iphe nwa ndu ono, phoduru nu ono e-keta. ¹³ O kwa ẹge ono, mbakeshi shi egudeje unube ndu onu-ulo Júda yele ke Izurelu l'ako onu ono; bukwaphu ẹge ya a-dzo unu; unu aburu ndu a goru onu-oma nu. Unu ba tsukwa egvu; ọ bulekwaphu te ẹka shihu unu ike."

¹⁴ Ojejoje, bu Okaribe-Kakota-Ike suru: "L'ọ kwa ẹge ono, ya kpeburu ome unu iphe du ẹji; ya ta aphuru unu imiko teke ono, ndiche unu phe kpatsuru iya iwe ono; ¹⁵ bukwaphu ẹge ya kpebuwaru nta-a ẹ ya e-meru ndu Jerúsalemu yele onu-ulo Júda ọhuma ọdo. Unu ba atsukwa egvu. ¹⁶ Qwaa iphe unu a-nodu eme ndo-ọ: Unu kfujeru ibe unu ire-lanu; unu ekpeje ikpe, du maa bya aburu ikpe, e-meje te nchi du ndoo. ¹⁷ Unu ba achijekwaru ibe unu ẹjo idzu l'ime obu unu; ophu unu akpapyabejekwa iphe unu meru; gua enwa ye iya. Iphe ono l'ọ ha; be ya kporu ashi. Ono iphe Ojejoje ekfu ndono."

¹⁸ Ojejoje, bu Okaribe-Kakota-Ike abyakwa

bya ekfuru yeru mu ọdo: ¹⁹ Ojejoje, bu Ọkaribe-Kakọta-Ike sọru: “T'unu wota aswiwi ono, unu aswiye l'ọnwa k'ẹno; me k'ise; me k'ẹsaa; me k'iri ono a-tuko buru oge ẹhu-ọtso-ẹna me oge ote ẹsua; oge eswe-iphe ẹhu-ọtso-ẹna l'ẹhu ọnu-ulo Júda. Oo ya bu t'unu yeru ire-lanu obu; unu eyeru nchi-odu-ndoo obu!”

²⁰ Ojejoje, bu Ọkaribe-Kakọta-Ike sọru: “Le ndu, du igwe a-bya; mbu ndu shigbaa le mkpukpu, du igwe. ²¹ Ndu, shi le mkpukpu lanu a-wuru je le mkpukpu ọdo je asu: “T'ẹphe je je arọ Ojejoje iphe; mbu t'ẹphe je achọ Ojejoje, bu Ọkaribe-Kakọta-Ike; l'ẹphebedua e-jeekwa.”

²² Igweligwe madzu; mekpọ mbakeshi, ike nọ l'a-bya achọ Ojejoje, bu Ọkaribe-Kakọta-Ike le Jerúsalemu; byakwaphu t'ẹphe rọ ya iphe.”

²³ Ojejoje, bu Ọkaribe-Kakọta-Ike sọru: “L'o -rua teke ono; be umadzu iri, ekfugbaa okfuli, du iche l'iche; bya eshigbaa le mba, du iche iche; e-gudeje onye Ju lanu; nmakua ya ẹka l'onu uwe iya; l'arọ iya t'ẹphe tsonuru iya; ke l'ẹphe nuwaru le Nchileke nọ; swiru ẹphe.”

9

Ikpe, ee-kpe ndu ohogu Ízurelu

¹ Owaa bu ozi, Ojejoje ziru zitiru ali Haduraku. Okfu ono a-tukowaru mkpukpu Damasukosu l'ishi; ke l'ẹnya ndiphe; me ẹnya iphe bu ndu okpa-ikfu Ízurelu bukota le Ojejoje b'a chiru iya doo. ² Okfu ono; be adakwaphu l'ekpu mkpukpu Hamatu, bu ndu ẹphe l'ẹphe riru oke; mekwaphu mkpukpu Taya yele mkpukpu

Sayidonu; t'a gufukwaru l'ephe maru iphe ntumatu. ³ Ndu Táya gudeekwa mgbodo tūpheta mkpukpu ephe mgburumgburu; kpūshia ya ike. Mkpōla-ōcha b'ō kuberu; yo byiru l'ō bụ eja; kube mkpōla-ododo l'ō bụ onye kuberu ozu lẹ mgboro esu-uzo. ⁴ Obenu lẹ Nnajiufu a-nafu ephe iphe bụ nk'ephe; bya enwuru eku ephe ye l'eze enyimu. Oku etsua yebedua tsufu.

⁵ Ndu Ashikelonu a-phu iya; tsua egvu. Ndu Gáza aphua ya; talahaa chichichi l'iphe-ehuka. O kwaphu ege ono b'oo-du ndu Ekuronu; ke l'iphe ephe shi ele enya iya a-buru ke mmanu. Ndu Gáza; be onye eze ephe a-nwuhu; Ashikulonu aburu eke madzu te ebudu ebubu. ⁶ O bu ndu ali odo e-bu lẹ mkpukpu Ashudodu. Ndu ke Filisutiya; be ya eme te ekuku, ephe eku onwephe kfushi. ⁷ Ya e-me t'onu ephe; ba tajehe anu, a gwaru lẹ nte; bya akpashia ephe nri ono, e meruru emeru, nyatsuaru ephe l'eze ono. Nwa ndu ophu phoduru nu a-buru ke Nchileke ayi; du l'ō bụ ndu ishi l'ali Júda. Ndu Ekuronu a-bya adu l'ō bụ ndu Jebusu. ⁸ Obenu lẹ ndibe iya; be ya a-nodu alu-chiru l'eka ndu ogu, adzo garamu garamu. E to nwehedu l'o nwekwaduru onye a-bya okpapyia ndibe iya ishi odo; kele nta-a; be ya chiwaru enya zia l'eke ephe no.

Abyabya eze ndu Záyonu

⁹ Unube ndu Záyonu!

Unu tee eswa teshia ya ike;
unu gua egvu
ehu-otso-ena;
unube ndu Jerúsalemu!

Unu lekwa; l'eze unu
 abyakfutaakwa unu.
 O bu onye, doberu ẹka ndoo;
 l'adzojekwaphu madzu.
 O wozitaru onwiya ali;
 noḍu l'eli nkakfu-igara l'agba abya;
 mbu l'eli nwa nkakfu-igara obu.*

- 10 Ndu Ifuremu; be ya a-nafu ugbo-inya ephe;
 nafukwaphu ndu
 Jerúsalemu inya-ogu ephe.
 Uta-ogu ono; be aa-gbaji.
 Eze unu a-ra iya arara;
 te mba yele mba ibe iya du le mma.
 Eke, oochi e-shi l'eze
 enyimu owaa daghaa eze enyimu ophu.
 Yo shikwaphu le
 Enyimu Yufurétusu
 noo jeye l'eke mgboko jeberu.

Eedobephu ndibe Nchileke

azu l'onodu ephe

- 11 "A -bya le nggubedua;
 ya e-gude ke ndzu ono,
 nggu l'iya gude mee gbaa ono;
 haa ndibe ngu, no le
 mkporo l'ime iduma ono,
 mini e-ta noḍu ono;
 mee ephe; ephe enweru onwephe.
- 12 Unu laphu azu l'eke ono,
 unu kpuru; yo shihu ike ono;
 unube ndu mkporo ono, enya du l'uzo ono!
 Mbu le nta-a;

* 9:9 9:9 Mát 21:5; Jon 12:15.

- bẹ ya arakwa iya arara:
 lẹ ya a-nụ unu iphe ha
 l'ọ bụ ọp̄hu unu shi
 nwehawaru ugbo ẹbo;
- 13 kẹle ya e-woru ndu Júda
 kwee l'ọ bụ onye, kweru ụta;
 woru ndu Ífuremu mee;
 t'ọ bụru akfụ, e gude agba ụta ọbu.
 Ya a-kpatsu unwoke Záyọnu;
 t'ẹphe bụru ọgu dakfu ndu kẹ Gurisu.
 Ya e-me ngu t'ị dụ l'ọ bụ
 ogu-mbeke, onye ike dụ l'ọgu pa."
- 14 Ono teke Ojejoje a-buru
 p̄e
 l'ẹke ndibe iya nọ.
 Akfụ iya ezilahaa
 p̄eremu p̄eremu
 l'ọ bụ ebemu-igwe.
 Ọkaribe-Kakọta-Nụ a-bya egbua ụpyoku.
 Yọ bụru oke ph̄erephere,
 shi ụzo ọhuda; bẹ oo-gude eje.
- 15 Ojejoje, bụ
 Ọkaribe-Kakọta-Ike e-gbochita ẹphe.
 Ẹphe e-gude mkpuma ụrobo
 mebyishia iphe;
 gude iya mekputa ẹphe.
 Ẹphe a-ngu m̄e;
 baa l'ọ bụ ndu m̄e tsuru.
 Ẹphe e-ji ejiji l'ọ bụ ochi,
 eegudeje ephe mee
 l'ẹnya-ngweja Nchileke.
- 16 Mbọku ono; bẹ Nnajiufu,
 bụ Nchileke ẹphe a-dzọfuta ẹphe;

ke l'ephe haa l'igwe; buru ndibe iya.
 Ephe a-nodu acha too l'ali
 ono l'ọ bu iphe, e gude
 dengaa okpu-eze edenga.

17 Ọ du ugu; l'ama mma.
 Iphe, a koru akoko a-nodu
 eme te unwu-okorobya ephe nweru ẹku;
 mee ophungu emekwaphu
 te unwanyi ephe bahu.

10

Ojejoje e-leta ndu Júda enya

¹ Unu kfuru Ojejoje t'ọ chiaru unu mini l'oge mini-odungu. Ọ kwa Ojejoje emeje te igwe rua eruru. Ọo ya ayọjeru unwu eliphe mini; bukwaru iya phu emeje te iphe no l'egu onyemonye l'aja pulapula. ² Ọguv agwota bu atukporoko; ndu njibya aphuje iphe e ta budu eziokfu; l'ezeje nro, e te medunu. Ike, ephe adu madzu aburu ochi; be ephe achi onye obu. Ọ bu iya kparu iphe madzu gbakashihuru l'ọ bu aturu, e te nwedu onye, eleta iya enya.

³ Meji adakwa iya kitikitii l'okfu ehu ndu eche aturu ono. Ya a-nukwanu ndu ishi ono aphu; kele Ojejoje, bu Okaribe-Kakota-Ike e-letaa aturu iya, bu iya bu onu-ulo Júda; mee ephe t'ephe du l'ọ bu inya, du uguv l'eke e gude iya alu ogu. ⁴ Ọ bu le Júda; be mkpuma, bu itso, gude ulo e-shi lufuta; buru iya; be nggu, gude ulo-ekwa e-shi; buru iya; be akfu, e gude alu ogu e-shi; bukwaru iya phu; be iphe bu ndu a-buru ishi e-shi lufuta. ⁵ Ephe a-tugbabe buru nanu l'ọ

bụ ndu ike-ka-l'ògu, nọ l'ògu. Ẹphe e-gude ọkpa dzọọ ẹpoto, nọ l'echi-uzo tọlitoli l'oge ọgu. Ẹphe a-lu ọgu; chikaa ndu gude inya l'alụ; kele Ojejoje nọ swiru ẹphe.

6 “Ya e-me t'ọnu-ulo Júda shihu ike;
bya adzọọ ọnu-ulo Jósefu.

Ya e-me t'ẹphe laphu azu l'ọnodu ẹphe;
kele ya a-phuru ẹphe imiko.
Ẹphe a-du l'ọ bụ ndu
ya te shidu jika ajika;
ke l'ọo yẹbedua bụ Ojejoje;
buru Nchileke ẹphe;
Ya a-zajẹ ẹphe oku.

7 Ndu Ífuremu e-mekochaa
du l'ọ bụ ndu ike du l'ògu.
Ẹhu a-nọdu atso ẹphe ẹna
l'ọ bụ ndu nguru mee.
Unwu ẹphe a-phụ iya;
tee ẹswa.

Ẹhu awata ẹphe ọtso ẹna l'ime Ojejoje.

8 Ya e-meru ẹphe ẹka; gude chibata ẹphe.
Ishi iya aburu le ya gbafutaje ẹphe;
ẹphe abya aha igwe ege ẹphe shi hahawa.

9 A makwaru-a le ya chikashiru ẹphe;
ẹphe atuko ekemeke dzuru;
ọle ẹphe e-shitsua eke,
teru ẹnya nyata iya.
Ẹphebedua; ẹphe
l'unwegirima ẹphe a-wafu; latashia.

10 Ya e-shi le Ijiputu je chilata ẹphe;
shi le Asiriya rukobe ẹphe.
Ya a-chiru ẹphe lata le
Giledu; me Lébanonu;

k'ophu bụ l'ẹ to nwehedu
 ẹke e-dzu ẹphe anọdu.

- 11 Teke ẹphe a-nọdu eswe
 eze ẹnyimu iphe-ẹhuka ono;
 bẹ ya e-me t'eyii-mini ono dazita;
 èbò Ẹnyimu Náyìlu l'ọ ha atashihu.
 Ekuku ono, ndu Asiriya
 eku onwẹphe ono adapyahụ;
 mgboro ono, shi bụru ike
 ndu Íjiputu ono aburu chaphungu.
- 12 Ya e-me; ike adụ ẹphe l'ime Ojejoje.
 Yọ bụru ẹpha Ojejoje; bẹ ẹphe e-gude eje.”
 Ono iphe Ojejoje ekfu ndono.

11

- 1 Nggube Lébanonu!
 Gúhashia ụzo ngu; ghebegbaa onu;
 k'ophu ọku e-tsu oshi sida ngu!
- 2 Unu kwaa ẹkwa;
 unubẹ oshi payinu;
 kẹ l'oshi sida daakwaru.
 Oshi ono, shi dughbaa
 egvu ono lakotaakwaru l'iyi.
 Unu tụa ụzu-ẹkwa;
 unubẹ achị, nọgbaa lẹ Báshanu;
 kẹ l'oke-ọswa oke-ọswa ono;
 b'a sukashigeekwaru.
- 3 Unu ngabekpodaphu nchị
 lẹ mkpu, ndu eche aturu echi;
 l'ẹgu ono, ẹphe echeje aturu
 ono; b'e mebyishiwaru.
 Unu nukpodaphu ekiri,
 agụ ede;

ke l'eze egbudu ono, shi nõdu
l'iku Enyimu Jõdanu ono;
b'e mewaru; yo gheru õnu.

Umadzu ebo, eche aturu

⁴ Ojejoje, bu Nchileke mu suru: “Tẹ unu nu-ji-jee igwe aturu ono, e doberu k'egbugbu ono ekwo epho. ⁵ Ndu zushiru iya nu; egbushia; to du iphe eeme epe. Ndu ophu ere iya erere; -nõdu; epe asu: ‘Tẹ ajaja buru ke Ojejoje; kele epe nwewaru eku.’ Mbu le ndu eche aturu ono ta aphujeduru iya imiko. ⁶ Oo ya bu le mu ta aphuheduru ndu ali-a imiko odo. Ono iphe Ojejoje ekfu ndono. Ya e-woru onyemonye ye ibe iya l'eka; me l'eka onye eze iya. Epe a-dzo ndu ali-a kutukutu; ophu ya adzotadu epe l'eka epe.”

⁷ To du iya bu; ndu echeje aturu ono abya eye mu iya l'eka te mu nuje iya nri. Mu abya awata õnu ikpoto aturu ono, e doberu ke egbugbu ono nri. Mu achita mgboro labu dobe. Nanu; be mu guru “N-yemobu”; bya agua ophu “Atugba”. Ya ndono; mu anulahaa ikpoto aturu ono nri. ⁸ O nweru umadzu eto odo, eche aturu l'eke ono. L'ime onwa lanu; be mu chiru umadzu eto. Ikpoto aturu ono akpo mu ashi; echeche, mu eche epe awolahaa mu enyiru. ⁹ Mu asu aturu ono: “Le mu te echehekwa epe odo. Te ndu ophu anwuhu nu nwuhu; ndu ophu ala l'iyi alaa l'iyi; ndu ophu phoduru nu ataa anu ibe epe.” ¹⁰ Mu abya ewota mgboro mu ophu aza “n-yemobu” nyajia; shi iya mebyia ndzu, mu l'iphe bu mbakeshi gbaru. ¹¹ Yo buru l'eswe

mbòku ono b'e mebyiru iya. Ndu ono, eme kẹ aturu ono, phuru mu nọ amalẹruphu l'ọo Ojejoje gude iphe ono, mu meru ono ekfu okfu. ¹² Mu asu ẹphe: “Ọ -buru l'ọ du unu mma; unu kfu mu ugwo mu. Teke ẹ to dudu; unu ahakwaaru.” Ẹphe akfu mu ukporo mkpola-ocha le mkpola-ocha iri.

¹³ Ya ndono; Ojejoje asu mu: “Tẹ mu woru iya je eye l'ẹke eeyeje okpoga eze-ulo Nchileke; mbu eze okpoga ono, ẹphe riru l'ọ bu aswa oru mu ono.” Mu ekwe nu; chita ukporo mkpola-ocha le mkpola-ocha iri ono je eye okpu-ite l'eka; l'eze-ulo Nchileke ono. ¹⁴ Mu bya anyajia mgboro mu phu k'ẹbo, mbu mgboro ophu eku “Atugba”; shi ẹge ono mebyia abubu ono, Juda yele Izurelu bu nwunne ono.

¹⁵ Ya ndono; Ojejoje asu mu: “Tẹ mu chitafua ngwa-oru onye eche aturu, ẹ to nwedu iphe o bu; ¹⁶ kele ya abyawa owolita onye eche aturu l'alifa, bu onye ẹ ta akpadu ishi aturu ono ndu ophu ephuhu ephuhu; ophu okpadu ishi ndu ophu anma kwekwee. Ndu ophu iphe mekaru b'ẹ to mebedu ogvu t'ẹphe ka mma; ophu onudu ndu ophu ẹhu du mma nri. Iphe oo-gbe emechia bu l'ọo-nodu ata anu ndu ophu gbaru ẹba; l'aswoshi iya aku-okpa iya. ¹⁷ Nshobukwaa onye ono, ẹ-te nwedu iphe o bu, eche aturu ono; mbu onye ono, apajeru aturu iya haa ono! Tẹ ogu-mbeke bufukwa iya ẹka yele ẹnya ẹka-utara! T'eka iya l'ọ ha nwukotakwa iya kpaa; ẹnya ẹka-utara iya apyahughee ya!”

12

Ndu ọhogu Jerúsalemu; bẹ ee-mebyishi

¹ Ọwaa ozi, Ojejoje ziru l'okfu ẹhu ndu Ízurelu. Ojejoje ono, bụ iya tọsaru akpamigwe; bụru iya tọru ọkpa mgboko gbaa mgburumburu; bya aburu iya kuru ume ye madzụ l'ẹhu; bẹ sụru: ² “Lẹ ya e-mekochaa mee Jerúsalemu t'ọ dū l'ọ bụ nggarashi mẹe, ndu bupheru ẹphe mgburumburu a-ngu; tuko akpolahaa gagaga. Ndu ono a-bya eyebuta Júda yele Jerúsalemu; kephée ya mgburumburu. ³ O -rua mbọku ono; bẹ ya e-me Jerúsalemu t'ọ bụru 'agburaḡbu mkpuma l'ifu ndiphe. Iphe bụ mba, jeru t'ẹphe nwuribe iya e-mekakwa onwẹphe iphe. Teke ono; bẹ iphe bụ mbakeshi lẹ mgboko a-chikobe onwẹphe t'ẹphe tsoo iya ọgu. ⁴ O -rua mbọku ono; bẹ ya e-yekota inya-ọgu ẹphe egvu; mee tẹ ọgvu bya ndu agba iya nū. Ono kwa iphe Ojejoje ekfu. Ẹnya iya a-nọ l'ẹke ndu Júda nọ. Obenu l'iphe bụ inya iphe bụ ndu ọhogu ẹphe; bẹ ya e-me t'ọ tsuhukota ishi. ⁵ Ọ bụ teke ono; bẹ ndu ishi ndu Júda e-kfu l'ime obu ẹphe; sụ: ‘Lẹ ike nọkwa ndu Jerúsalemu; kele Ojejoje, bụ Ọkaribe-Kakọta-Ike bụ Nchileke ẹphe.’

⁶ “O -rua mbọku ono; bẹ ya e-me ndu ishi ndu Júda t'ẹphe kee too l'ọ bụ itsu-ọku, e shiberu l'ọku; m'ọ kwanu l'ọ bụ ẹke ọku etsu ẹswa ereshi. Ẹphe e-kepyashi ndu, nọ-pheru ẹphe mgburumburu l'ẹka-utara; mẹ l'ẹka-ibyita. Obenu lẹ Jerúsalemu a-nọdulee ẹge ọnono. Ẹ to nwedu iphe eme iya nū.

7 “Ojejoje e-vuoduru ụzo dzọta ẹke, ndu Júda bu; k'ọphu ugvu, aa-nọdu akwabẹ ọnu-ụlo Dévidi yele ndu, bu le Jerúsalemu ta akadu ke ndu Júda nshinu. ⁸ O -rua mbọku ono; be Ojejoje e-gbochita ndu, bu le Jerúsalemu; k'ọphu bu l'onye ọphu kagee aruhu l'ẹphe; be ike a-du l'ọ bu Dévidi; ndu ọnu-ụlo Dévidi edukwanu ẹphe l'ọ bu Ojozi Ojejoje; mbu l'ọ bu Nchileke l'onwiya. ⁹ O -rua mbọku ono; be iphe ya a-wata ememe bu omebyishi iphe bu mbakeshi, bu ndu etso Jerúsalemu ọgu.

¹⁰ “Odo bu le ya e-woru ume k'eze-iphe-oma; me ke okfu anu Nchileke wua l'ọnu-ụlo Dévidi yele ẹhu ndu, bu le Jerúsalemu. Yo buru yebe onye ono, ẹphe gvukashiru iphe l'ẹhu ono; be ẹphe a-nọdu ele ẹnya l'ẹka. Ẹphe a-nọdu araa ẹkwa iya l'ọ bu onye ara ẹkwa nwa, bu iya nwọkwereka; mbu l'oo-rua ẹphe l'ẹhu ẹge ooruje onye ọkpara iya nwuhuru. ¹¹ O -rua mbọku ono; be uzu-ẹkwa, aa-nọdu atụ le Jerúsalemu a-du egvu. Ọo-dulephu l'ọ bu uzu-ẹkwa, a turu Hadadu Rimonu le ẹgu Megido. ¹² Mbu le ndu alị ono a-gu aphu; ikfu, nonu; ẹphe ayokobe: ẹphe l'unyomu ẹphe l'agu nk'ẹphe. Ikfu ọnu-ụlo Dévidi ẹphe l'unyomu ẹphe a-dokobe; ikfu ọnu-ụlo Nétanu ẹphe l'unyomu ẹphe adokobe; ¹³ ikfu ọnu-ụlo Lívayi ẹphe l'unyomu ẹphe a-dokobe; ikfu ọnu-ụlo Shimeyi ẹphe l'unyomu ẹphe adokobe; ¹⁴ mewaru iphe bu ikfu ono, phoduru nu ono l'ẹhu l'ẹhu ẹphe l'unyomu ẹphe.

13

¹ “O -rua mbòku ono; bẹ aa-gùharu ọnu-
 ọlo Dévidi ọgba-mini yẹle iphe bụ ndu, bu lẹ
 Jerúsalemu; gude iya safu ẹphe iphe dọ ẹji,
 ẹphe meshiru; mẹ aturu, ẹphe tūruru onwẹphe.

² O -rua mbòku ono; bẹ ya e-me t'ẹ be kujehẹ
 ọmarali ẹpha ekuku lẹ phuu l'ali-a; ọphu ta
 byadọ bya anyatakwadu iya anyata lẹ phu. Ono
 kwa iphe Ojejoje, bụ Ọkaribe-Kakọta-Ike ekfu
 ndono. Ndu nkfuchiru ẹphe; mẹ ume, aturuje
 madzọ; bẹ ya a-tuko woshikota t'ẹ b'ọ nọhẹ l'ali-

a. ³ Ọ -buru l'o nweru onye gbalihuru nọ; sọ
 lẹ ya ekfuchiru Nchileke; bẹ nna iya lẹ nne iya,
 bụ ndu mọru iya nọ a-sọ iya: ‘Lẹ ịi-nwùhukwa;
 kẹ l'ị dzuru ẹjo-ire; sọ lẹ Ojejoje kfuru iphe ẹ
 to kfudu.’ Onye ono gbado iya; kfuchilahaaru
 Ojejoje; bẹ nna iya ono yẹle nne iya ono, mọru
 iya nọ ono a-nmagbu iya. ⁴ O -rua mbòku ono; bẹ
 iphere e-gudeje ndu nkfuchiru l'egbe iphe ẹphe
 a-nọduje aphụ l'aphụ. Ọphu ẹphe 'eyehedu uwe
 ẹji ẹji ono, ẹphe gude edephushi ndiphe ono.

⁵ Iphe ọo-nọdu ekfu bụ: ‘Lẹ ya ta bukwa onye
 nkfuchiru. Lẹ ya bukwa onye akọ okfu. Keshinu
 ya bụ nwata; kwa iphe a kọtaru l'ali; bẹ ya gude
 buru.’ ⁶ O -nweru onye jiru iya sọ iya: ‘?Ichii
 iphe ọwaa, tuko ngu ẹhu dzuru ọwaa bụhunu
 kẹ ngunu?’ Yọ sọ iya: ‘L'ọ kwa lẹ kẹ onye, yẹ ẹya
 eshi ọnyà b'e mekaru iphe.’ ”

*E -chia onye eche aturu iphe; aturu iya ag-
 bakashihu*

⁷ “Nggube ogu-mbeke; tehu etehu; je etsoo
 onye ono, echeru iya aturu ono ọgu. Ọ kwa

onye ono, nọ iya ntse ono; bẹ ya sūru t'i tsoo ọgu. Ono kwa iphe Ojejoje, bu Ọkaribe-Kakọta-Ike ekfu. Gbugbua onye eche aturu; te aturu ono gbakashihu. Yẹbedua a-machi ẹka; tso ndu ọphu ka nwanshii ọgu. ⁸ Ee-woru ndu, bu l'ali-a mgburumgburu kee ọzo ẹto: ọzo labu; bẹ eegbushi; ọzo lanu; bẹ aa-ha t'ẹphe nọdu. Ono kwa iphe Ojejoje ekfu. ⁹ Ọzo lanu ono; bẹ ya e-woru ye l'ọku; bya anucha ẹphe anucha l'ọ bu onye anucha mkpọla-ọcha; bya adata ẹphe adata; l'ọ bu onye adata mkpọla-ododo. Ndu ono e-ku iya ẹpha; ya aza ẹphe. Ya asu l'ẹphe bukwa ndibe iya; ẹphebedua asu lẹ Ojejoje bukwa Nchileke ẹphe.”

14

Ojejoje abyaakwa ọburu eze

¹ Unu lekwa! Lẹ mbọku kẹ Ojejoje abyaakwa, bu mbọku, aa-bya anọdu unubẹ ndu Jerúsalemu l'ifu kee iphe unu, a kwaru l'ọkwata. ² Mbọku ono; bẹ ya a-chita iphe bu mbakeshi t'ẹphe jeru Jerúsalemu ọgu. Ẹphe a-lu luta mkpukpu ono; kwaa ọlo ono l'ọkwata; gude unwanyi unu l'ike; faa ẹphe kutukutu. Ee-kee mkpukpu ono ẹbo; kpua ọzo lanu lẹ ndu. Ọle ndu ọphu phoduru nu ta dukwanu onye akpufu ẹphe lẹ mkpukpu ono. ³ Teke ono; bẹ Ojejoje e-je etso iphe bu mbakeshi ono ọgu; lu ya ẹge ono, ọoluje l'oge ọgu ono. ⁴ O -be mbọku ono; bẹ oo-gude ọkpa iya vudo l'eli Ugvu Olivu, nọ l'uzo ẹnyanwu-ahata Jerúsalemu. Ugvu Olivu ono a-bya ebukahu ẹbo;

tsube l'uzo ɛnyanwu-ahata jeye l'uzo ɛnyanwu-ariba. Echi iya aburu ɔda, a-ha nshinu; ke l'ugvu ono ɛka lanu e-shi ɔzo isheli; ɛka iya ophu eshia ohuda. ⁵ O bu l'uda ugvu iya ono; be unu e-tSORU gbalaa; ke l'ogologo iya e-ru ÁZelu. O bu egbe oso, unu gbaru teke ali nmaru jijiji le Uzaya bu eze ndu Júda-a; be unu a-gba. Ono bu teke Ojejoje, bu Nchileke iya a-bya. Iphe bukpo ndu du nsɔ l'ephe ha e-tsokwaru iya phu abya.

⁶ Mboku ono; be iphoro ta adudu; oyi ta tsu.

⁷ Mboku ono e-likolephu nanu: e to nwedu eswe to nwe ɛnyashi; kele nchi -jihutsua; be iphoro anole-e. O bulephu Ojejoje maru ege mboku ono a-du.

⁸ O -rua mboku ono; be mini, anu ndzu e-shi le Jerúsalemu atsoshi. Oo-ke ebo: ɛkalanu atso ala eze ɛnyimu ɔzo ɛnyanwu-ahata; ophu l'atso ala eze ɛnyimu ɔzo ɛnyanwu-ariba. Onodu atso l'oge okochi; l'atso l'oge winta. ⁹ O bu Ojejoje a-buru onye eze, a-nodu achi mgboko mgburumgburu. O -rua mboku ono bu Ojejoje lanu a-du; yo buru epha iya nwenkinyi bu epha, aa-maru.

¹⁰ Ali-a ono l'o ha; tsube le Géba jeye le Rimonu l'uzo ohuda Jerúsalemu; a-dukota l'o bu ɔzo ohuda Araba. Obenu le Jerúsalemu; be aapali; yo nodu l'eke o no; tsubekpoo le Onu-oguzo Bénjaminu; je akpaa le Onu-oguzo Mbu; jeyewaru le Onu-oguzo Aguga; mewaru tsube l'ulo-eli Hananelu jeye l'eke aapyishiru onye eze akpuru vayinu. ¹¹ Jerúsalemu; be madzu a-bya ebua odo. Mburonu ke o-la-l'iyi ta adakfutahedu iya odo. Jerúsalemu e-bu l'ehu-gudangu.

¹² Ọwaa ẹjo iphe-ememe, Ojejoje e-kpukposhi iphe bụ mbakeshi ono, tsoru Jerúsalemu ọgu ono. Ẹphe e-vudoje evudo; anụ, nọ ẹphe l'ẹhu ereshihu. Ẹnya ẹphe e-chigaru l'ẹke, o chigaru reshihu: ire ẹphe anọdu ẹphe l'ọnu reshihu.

¹³ O -rua mbọku ono; bẹ Ojejoje e-me tẹ madzụ wata ọtsu egvu. Onyenọnu a-wojeru ibe iya; ẹphe awata ọgu. ¹⁴ Ndu Júda a-nọdukwapu lẹ Jerúsalemu lụa ọgu. Ẹku, ẹphe kparu; mbụ iphe bụ mbakeshi, bupheru ẹphe mgburumgburu; bẹ aa-chikobekota; mbụ lẹ mkpọla-ododo a-pa iya ẹka yẹle mkpọla-ọcha; yẹle ẹkwa, aanma anmanma.

¹⁵ Egbe ẹjo iphe-ememe ono, e kpukposhiru unwu ndiphe ono; bẹ ee-kpukposhikwapu inya; inya-mulu; inya-ivu yẹle nkakfu-igara; mewardu iphe bụ anụ, nọ l'ẹke ẹphe kpọberu ụlo-ékwa ẹphe.

¹⁶ Ono teke nwa ndu, wafuru nụ lẹ ndu ono, shi l'iphe bụ mbakeshi ono, shi etso Jerúsalemu ọgu ono; e-jeje Jerúsalemu iphe bụ afa l'afa, mọtaru amuta je ọbaru onye eze ono ẹja; mbụ Ojejoje, bụ Ọkaribe-Kakọta-Ike; ẹphe ejekwapu ọgba Aji Mkpù. ¹⁷ O -nweru ndu, bu lẹ mgbokoa, ẹ te ejedu Jerúsalemu je ọbaru onye eze ono ẹja; mbụ Ojejoje, bụ Ọkaribe-Kakọta-Ike; bẹ mini ta achiheduru ẹphe. ¹⁸ Ọ -buru lẹ ndu Íjiputu te ejedu je eye iya ẹka; bẹ mini ta achikwaru ẹphe. Ojejoje e-kpukposhikwapu ẹphe ẹjo iphe-ememe ono, o kpukposhiru iphe bụ mbakeshi ono, ẹ tejedu ọgba Aji Mkpù ono. ¹⁹ Ono a-buru aphụ, aa-nụ ndu Íjiputu yẹle iphe

bụ mbakeshi, ẹ te jedu Jerúsalemu je ọgba Aji Mkpù ono.

²⁰ O -rua mbọku ono; bẹ iphe ee-deje ẹ mgbirigba, inya nya l'olu bụ: “Iphe duru Ojejoje nsọ”. Ite oshi-iphe nọ l'eze-ulo Nchileke a-duje l'ọ bọ ochi, dọ nsọ, anọje l'ifu ẹnya-ngweja. ²¹ Iphe bụ ite, nọkota ẹ Jerúsalemu mẹ ẹ Júda a-duru Ojejoje, bụ Ọkaribe-Kakọta-Ike nsọ. Ndu, byaru ogworu Nchileke ngweja l'ẹphe ha ahajeru wota ite ono gude shia anụ ngweja. Ọdo bụ l'o -rua mbọku ono; bẹ ndu nghọ ta anọhedu l'ulo Ojejoje, bụ Ọkaribe-Kakọta-Ike.

Bayiburu Ikwo
Ikwo: Bayiburu Ikwo Bible

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3867ef4e-3384-5ab4-a937-63476bb8a7bb